

## EVANS, WILLIAM (bu farw 1589/90), uchelwr clerigol

**Enw:** William Evans  
**Dyddiad marw:** 1589/90  
**Rhiant:** Ieuan ap Thomas  
**Rhyw:** Gwryw  
**Galwedigaeth:** uchelwr clerigol  
**Maes gweithgaredd:** Crefydd; Teuluoedd Brenhinol a Bonheddig  
**Awdur:** Robert Thomas Jenkins

Ganwyd ym maenordy Llangatwg-feibion-Afel, sir Fynwy, yn fab hynaf (medd [Clark](#)) i Ieuan ap Thomas (geilw [Dafydd Benwyn](#) y tad yn ' Siôn '), disgynnydd (trwy fab gordderch) i [Syr William ap Thomas](#) o Raglan, ac felly un o dylwyth yr Herbertiaid; daliai William Evans fywoliaeth y plwyf (ym mharc y plas y mae'r eglwys) a chyda hi guradiaeth gyfagos, y gorfodwyd ef yn 1563 i roi curad ynddi. Yr oedd hefyd yn berson S. Ffagan yn 1560. Ond yn Llandaf yr oedd yn byw. Bu'n ganghellor esgobaeth Llandaf (nid y cabidwl) o 1550 hyd ei farw, ac o 1558 neu 1559 hyd ei farw yn ganon a thrysorydd yr eglwys gadeiriol. Yr oedd hefyd yn brebendari yn Exeter (nodir hynny ar garreg ei fedd; penodwyd ei olynydd fis Mai 1590), ac efallai hefyd yn Henffordd (ni ddywedir hynny ar ei feddrod, ond yr oedd *rhyw'* William Evans ' yn dal prebend yno yn 1560 ac yn 1580). Yn ôl Foster (*Alumni Oxonienses*), cafodd radd B.C.L. yn Rhydychen ar 18 Gorffennaf 1552 - ' L.L.B. ' meddai carreg ei fedd. Amheuid ef tua 1558 o ogwyddo at Babyddiaeth; ond wftia ei gyfeillion y beirdd y syniad hwnnw. Yn wir, ni cheir arwydd y poenid ef gan amheuon diwinyddol, nac o ran hynny fod ganddo ofal mawr dros fuddiannau ei eglwys, oblegid ni all nad oedd yn ddarn-gyfrifol (ac yntau'n drysorydd) am gyflwr adfydus eglwys Llandaf, a ddatguddiwyd pan wnaeth yr [esgob William Blethin](#) ei ymweliad swyddogol â Llandaf yn 1575. Uchelwr mewn urddau, a dyna'r cwbl, gellid meddwl. Bu farw 5 Ionawr 1589/90, a'i gladdu yn eglwys Llandaf.

Ond yr oedd iddo ochr arall hynod ddiddorol: yr oedd yn noddwr prydyddiaeth. Geilw [Dafydd Benwyn](#) ef yn ' Ifor Hael Llandaf,' a dywed fod ganddo ' fardd teulu,' [Maredudd ap Rhoser](#). Gadawodd [Sils ap Siôn](#) gasgliad o brydyddiaeth a ganwyd i'r canghellor gan gynifer ag wyth o feirdd; noda hefyd iddo fod yn un o ddau feirniad yn Llandaf ar gwrdd o feirdd a gystadlai ar englynu'n fyrfyr - y math o gwrdd a alwyd yn ddiweddarach yn 'eisteddfod.'

### Awdur

Yr Athro Emeritus Robert Thomas Jenkins, (1881 - 1969)

### Ffynonellau

(a) G. T. Clark, *Limbus Patrum Morganiae et Glamorganiae* (1886), 306

Browne Willis, *A survey of the Cathedral Church of Llandaff* (1719), 23, 85, 100, 196, 198, 207

Le Neve, *Fasti Ecclesiae Anglicanae* (1854), i, 421, 518, ii, 262

Foster, *Alumni Oxonienses* - ni wyddys ar ba sail y deil Foster mai ef oedd y 'William ap Jevan' a gafodd ficeriaeth Granston yn sir Benfro yn 1559, a hefyd ei fod yn ficer Llandylwyl yn 1560

Lawrence Thomas, *The Reformation in the Old Diocese of Llandaff* (1930), xix, 119, 134, etc

(b) G. J. Williams, *Traddodiad Llenyddol Morgannwg* (1948) (mynegai)

### Dolenni Ychwanegol

Wikidata: [Q20734605](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

